
“ЯНГИ НАФАС” ЮГУРИШ МУСОБАҚАСИ ФАРҒОНАДА КЎТАРИНКИ РУҲДА ЎТДИ

Бугун эрта тонгдан Фарғонада “Бир ватанда, бир вақтда, бир хил масофага, бир мақсадда – бирга югурамиз!” шиори остида “Ёшлар куни”га бағишланган “Янги нафас” югуриш мусобақаси ва веломарафон бўлиб ўтди.

Вилоят ҳокимлиги, вилоят спортни ривожлантириш бош бошқармаси, вилоят адлия бошқармаси, Шарқий ҳарбий округ қўмондонлиги ҳамда бошқа масъул ташкилотлар ҳамкорлигида ташкил этилган мусобақада ёшлар, кексалар ҳамда имконияти чекланган шахслар қатнашди.

4 минг нафардан зиёд иштирокчилар Фарғона шаҳридаги ал-Фарғоний кўчасидан Ислон Каримов номидаги вилоят Театр-концерт саройигача бўлган 3 километрли масофани босиб ўтишди.

Ғолиблар ва совриндорларни тантанали тақдирлаш маросимида вилоят ҳокими ўринбосари Файзулло Қосимов, Фарғона шаҳар ҳокими Восилжон Назаров, вилоят адлия бошқармаси раҳбари Абдуманноп Бўриев иштирок этдилар.

Аёллар ўртасида Арофатхон Имомалиева фахрли биринчи ўринни эгаллаган бўлса, Раҳматилло Нуралиев эркаклар ўртасида етакчи бўлди.

Имконияти чекланган шахслар орасида Иқболжон Холматов, Нилуфар Шерматова каби энг фаол иштирокчилар ҳам тадбирда алоҳида эътироф этилди.

Ғолиб ва совриндорларга диплом ва совғалар топширилди.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-06-26 14:46:17